

**BOSNA I HERCEGOVINA  
FEDERACIJA BOSNE I HERCEGOVINE  
SREDNJOBOSANSKI KANTON/KANTON SREDIŠNJA BOSNA  
OPĆINSKI SUD U JAJCU  
Broj: 128 0 K 037527 23 K  
Dana: 27.06.2023. godine.**

**U IME FEDERACIJE BOSNE I HERCEGOVINE**

Općinski sud u Jajcu, po sudiji Aleksandru Trkulji, uz sudjelovanje zapisničarke Esme Ganibegović, u krivičnom predmetu protiv optuženog M. K., sina H., radi izvršenja kaznenog djela Teška kaznena djela protiv sigurnosti javnog prometa iz članka 336. st.1. u vezi sa člankom 332. st.1. Krivičnog zakona Federacije Bosne i Hercegovine, a po optužnici Kantonalnog tužilaštva Travnik, broj : T06 0 KT 0031570 22 od 26.09.2022. godine, nakon održanog glavnog pretresa i pretresa za izricanje krivično pravne sankcije od dana 27.06.2023. godine u odsustvu uredno obaviještenih stranaka, dana 27.06.2023. godine donio je i javno objavio :

***P R E S U D U***

**Optuženi:**

**M. K., zv. „M.“**, sin H. i majke R., djevojački A., rođen ... godine T., nastanjen na adresi ... br. ..., općina T., ..., državljanin ..., JMB: ..., zaposlen u ... u J., oženjen, otac jednog djeteta, pismen sa završenom SSS, nije služio vojsku, bez čina i odlikovanja, ne vodi se u vojnoj evidenciji, srednjeg imovnog stanja, neosuđivan,

**K R I V J E**

**Što je:**

Dana 14.05.2022.godine oko 11,12 sati, u ulici Stjepana Tomaševića u Jajcu, općina Jajce, iz smjera Plivskih jezera prema centru grada Jajca, postupio protivno odredbi čl.39. st.1 i čl. 184. st 1 Zakona o osnovama sigurnosti prometa na cestama u BiH, upravljajući putničkim vozilom marke Audi A3, registarskih oznaka ..., na dijelu puta gdje je cesta prava i ravna, bez horizontalnih i vertikalnih krivina, a kolovoz suh, ugrozio javni promet i doveo u opasnost živote ljudi, na način da je vozeći bez vozačke dozvole i prometnom trakom namijenjenom za kretanje vozila iz suprotnog smjera, svjestan da upravljajući vozilom na takav način dovodi u opasnost život ljudi i da drugog može teško tjelesno ozlijediti i pristajući na to, kojom prilikom je uslijed takve vožnje ostvario kontakt sa biciklom kojim se iz suprotnog smjera kretao oštećeni Mldb.1 koji je uslijed nabacivanja na poklopac motora i prednje

vjetrobransko staklo a zatim i odbačaja na kolovoz zadobio tjelesne povrede u vidu nagnječenja poglavine, oguljotine kože u području čela i lica, kao i prijeloma obje lijeve podlaktice u području ručnog zgloba, koje po svom zbiru spadaju u teške tjelesne ozljede

Dakle, kao učesnik u prometu na putevima ne pridržavajući se prometnih propisa ugrozio javni promet i doveo u opasnost život ljudi, uslijed čega je druga osoba zadobila teške tjelesne povrede

**čime je počinio kazneno djelo teška kaznena djela protiv sigurnosti javnog prometa iz članka 336. st. 1 u vezi sa člankom 332. st.1. KZ F BiH.**

Pa sud optuženom na temelju naprijed navedenog člana a u vezi sa članovima 43. i 62. ZKP-u F BiH izriče :

### **UVJETNU OSUDU**

Kojom se optuženom M. K. za krivično djelo opisano izreci ove presude utvrđuje **kazna zatvora u trajanju od 6 (šest) mjeseci**, koja se **NEĆE IZVRŠITI** ukoliko optuženi u periodu od 1 (**jedne**) godine od dana pravosnažnosti ove presude ne počinu novo krivično djelo.

Oštećeni maloljetni Mldb.1, sin B., se putem zakonskog zastupnika - oca B. L. sina Z., u pogledu imovinsko pravnog zahtjeva upućuje na parnični postupak.

Na ime troškova krivičnog postupka optuženi je dužan ovom sudu naknaditi iznos od 50,00 KM u skladu sa odredbom čl.202 st.1. ZKP-a.

### ***Obrazloženje***

Aktom broj T06 0 KT 0031570 22 od 26.09.2022. godine Kantonalno Tužilaštvo Travnik podiglo je optužnicu protiv M. K. zv. „M.“, sina H., kojom se optuženom na teret stavlja izvršenje kaznenog djela Teška kaznena djela protiv sigurnosti javnog prometa iz članka 336 st.1. u vezi sa člankom 332 st.1. Krivičnog zakona Federacije Bosne i Hercegovine.

Nakon potvrđivanja optužnice od strane sutkinje za prethodno saslušanje, pred istim je zakazano ročište za izjašnjenje o krivnji.

Na održanom ročištu za izjašnjenje o krivnji optuženi se izjasnio da je kriv, te je primjenom člana 244. stav (2) ZKP-a F BiH predmet upućen drugom sudiji istog suda radi zakazivanja ročišta radi razmatranja izjave o priznanju krivnje.

U postupku razmatranja izjave o priznanju krivnje, sud je cijenio dato priznanje optuženog uz ocjenu da li postoji dovoljno dokaza vezanih za krivičnopravnu radnju za

koju je optuženi priznao krivnju kako bi sud na taj način donio odluku o prihvatanju datog priznanja optuženog.

Razmatrajući izjavu o priznanju krivnje optuženi se jasno izjasnio da je kriv za počinjeno krivično djelo sadržano u optužnici, da je njegovo priznanje dato bez prisile, svjesno i sa razumijevanjem, kao i da je svjestan svih posljedica koje proizilaze iz datog priznanja, a naročito da je svjestan krivično pravne sankcije propisane za krivično djelo koje mu se stavlja na teret optužnicom, mogućnosti obaveze naknade troškova krivičnog postupka i obaveze vezane za imovinskopравни zahtjev.

U provedenom dokaznom postupku sud je izveo dokaze uvidom u: Zapisnik o uviđaju PS Jajce broj: 02/5-3-1-04-9-1-184/22 VN od 14.05.2022.godine, Crtež lica mjesta PU Jajce od 14.05.2022.godine, Foto-dokumentacija PS Jajce broj:02/5-3-1-04-2-30/22 PJ od 14.05.2022.godine, Zapisnik o ispitivanju alkokotestom radi utvrđivanja alkoholiziranosti MUP Travnik od 14.05.2022.godine, na ime M. K., Prijava povrede u saobraćaju Dom zdravlja Jajce na ime Mldb.1, od 14.05.2022.godine, Otpusno pismo Opće bolnice Jajce, Odjel Hirurgija od 17.05.2022.godine, na ime Mldb.1, Kontrolni pregled Opće Bolnice Jajce broj: 1863 od 19.05.2022.godine, na ime Mldb.1, Nalaz i mišljenje psihijatra JU Dom zdravlja broj: 1911/22od 01.07.2022.godine, na ime Mldb.1, Nalaz sudsko medicinskog vještačenja po vještaku Branimiru Markunović od 06.09.2022.godine, Prometno tehničko vještačenja po vještaku Stipi Martinović od 20.09.2022.godine, Izvod iz kaznene evidencije za osumnjičenog M. K. MUP, PU Tuzla, Odjeljenje kriminalističke policije Tuzla broj:08-06-/7-1-03.7-3-5-12349/22- IM od 05.08.2022.godine, Troškovnik KT Travnik od 26.09.2022.godine, Službena zabilješka PS Jajce broj: 02/5-3-04-9-2-467/22 od 14.05.2022.godine, Zapisnik saslušanju svjedoka Mldb.1 PS Jajce broj: 02/5-3-1-04-9-4-233/22 VN od 03.06.2022.godine.

Razmatrajući izjavu o priznanju krivnje optuženog, uz to cijeneći dokaze Tužilaštva sud nalazi da stoji osnov za zaključak da se prihvati izjava o priznanju krivnje koja je data dobrovoljno, sa razumijevanjem gdje je i sam optuženi svjestan posljedica koje proizilaze iz datog priznanja.

Sud smatra utvrđenim da su se radnjama optuženog stekla sva obilježja bića kaznenog djela „Teška kaznena djela protiv sigurnosti javnog prometa” iz članka 336 st.1. u vezi sa člankom 332 st.1. Krivičnog zakona Federacije Bosne i Hercegovine.

Prilikom odlučivanja o vrsti i visini krivične sankcije, sud je cijenio sve okolnosti predviđene članom 49. KZ F BiH, te je od olakšavajućih okolnosti na strani optuženog cijenio činjenicu da je optuženi priznao počinjenje krivičnog djela koje mu se stavlja na teret već u ranoj fazi ovog postupka pri kojem priznanju je ostao dosljedan do okončanja postupka čime je doprinio efikasnosti cijelog krivičnog postupka, činjenicu da je optuženi izrazio kajanje zbog počinjenog krivičnog dijela koje mu se optužnicom stavlja na teret, kao i činjenicu da je optuženi prethodno nekažnjavan te da se protiv njega nije vodio krivični postupak.

Otežavajućih okolnosti na strani optuženog sud nije našao.

Sud je mišljenja da će se usljed svega navedenog izricanjem kazne kao u izreci ove presude u cijelosti ostvariti proklamirani ciljevi specijalne i generalne prevencije.

Na održanom ročištu za ocjenu uslova za izricanje vrste i visine krivično pravne sankcije saslušan je i zakonski zastupnik maloljetnog oštećenog Mldb.1, njegov otac B, L., koji je izjavio da predlaže da ovaj sud oštećenog svojom odlukom uputi na parnični postupak. Sud je uvažio izneseni prijedlog oštećenog te u pogledu imovinsko pravnog zahtjeva odlučio kao u izreci ove presude.

Sud je obavezao optuženog na plaćanje sudskog paušala u iznosu od 50,00 KM smatrajući da je taj iznos srazmjeran složenosti i trajanju krivičnog postupka te imovinskim prilikama optuženog, a sve shodno članu 202. stav 1. ZKP-a F BiH.

Zapisničarka  
Esma Ganibegović

S u d i j a  
Aleksandar Trkulja

**PRAVNA POUKA** : Protiv ove presude, može se izjaviti žalba Kantonalnom sudu u Novom Travniku putem ovog suda u roku od 15 dana od dana prijema presude. Žalba se izjavljuje u dovoljnom broju primjeraka za sud i suprotnu stranu.